



La Convention 2025 dal Ent Friûl tal Mont si vierzarà ai 20 di Jugn a Cormons

Il Friûl cence confins: conessions globâls, lidrîs locâls. Chest al è il titul da la Convention 2025 dal Ent Friûl tal Mont che si vierzarà ai 20 di Jugn a Cormons e e larà indevant sabide 21 tal Auditorium de culture furlane di Guriza, in direte su Telefriuli e online su www.telefriuli.it. E je stade sielte Guriza par vie che chest al è l'an di Go!2025, il grant event che al unîs Guriza e Gnova Guriza tant che Capitâl europeane de culture, cûr di une rassegne che e puarte a nivel internazionâl no dome lis dôs citâts ma dute la nestre region e la Slovenie.

La concomitance cun Go! 2025 i da un grant significât ancje al incuintri anuâl dal Ent Friûl tal Mont, che al rive sul Lusing ta chel che une volte si clamavilu "Friûl austriac", patrie di tancj emigrâts disparniçâts in dut il mont, tiere di confin e propit par chest di fradaie e comunion di popui. Guriza e la sô provincie a fasin part ad in plen dal Friûl storic.

E nol è un câs che la Societât Filologjiche Furlane e sedi nassude, tal 1919, propit achì.

La anime furlane di Guriza e je storiche e si le cjate indulà che si fevele la marilenghe, element di identitât ricognossût ancje tai palaçs di Viene; dongje dal furlan o cjatin il sloven, il todesc e il talian, tant che testimoniance dal spirt european di cheste citât, propit come il so flum che nol è plui un confin ma al è

Il Friûl cence confins

deventât simbul di fradilance e di union tra i popui.

La presince a Guriza dal Ent Friûl tal Mont e dai Fogolârs Furlans di ducj i continents, che di simpri a puartin pal mont i valôrs dal lavôr, da la pâs e dal jutori, e je la nestre maniere di dâ un contribût par sparniçâ chest messaç e il significât plui profund dal sproc "Friûl cence confins" che al è stât sielt tant che titul dal incuintri e che, tal spirt di Go!2025, al pant sedi lis conessions globâls dal mont contemporani, sedi la

impuartance da lis lidrîs, dai leams, da la apartignince a une comunitât e a un teritori, il valôr da la convivençe di popui e di minorancis diferentis che Guriza e rapresente.

I confins tant che lûc di incuintri, lis minorancis tant che imprest di dialic e di cooperazion: cun chest spirt, e cu la dimension cosmopolite da la diaspore furlan tal mont, l'Ent Friûl tal Mont si fâs puarte vòs di un messaç di pâs e di dialic, di incuintri e di jutori, di coraç tal frontâ lis disfidis dal doman.

Lis iniziativis a tacaran ai 20 di Jugn a Cormons li che, a lis 11.30 a buinore tal Centri di valorizazion e promozion dal Cuei, si darà il benvignût a lis delegazions dai furlans tal mont. A lis 6 sot sere inte glesie dal SS. Non di Marie a Capriva, e sarà la Messe celebrade dai Vicjaris gjenerâi di Guriza e di Udin e compagnade dal Grop Polifonic di Capriva.

Par finî, lis delegazions si daran adun a Vile Russiz pal incuintri "Guriza capitâl europeane da la culture ancje in cusine e tal vin" par cure di Roberto Zottar e Rodolfo Rizzi.

Sabide 21 dutis lis voris si fasaran a Guriza, tacant a lis 10 a buinore tal Auditorium de culture furlane cu la cunvigne che i da il titul a la convention "Il Friûl cence confins: conessions globâls, lidrîs locâls".

A indi cjaparan part Gianna Di Danieli, presidente di Paneuropa Italia, Franco Cecotti, storic dal confin orientâl e Paola Roja, judiç penâl.

Daspò Federico Vicario, president da la Societât Filologjiche Furlane, al presenterà lis edizions dal libri "Scrivi par furlan" in lenghe spagnole e inglese. La zornade si sierarà in Cjasa Ascoli, sede da la Societât Filologjiche Furlane, cu la scree da la mostre "Gurize e lis Alps Juliis" di Mario Micossi par cure dal prof. Gianfranco Ellero. Cjasa Ascoli e restarà vierte dut il dì par podê visitâ la mostre permanente "Lis lenghis di Guriza".

La spassizade a Aquilee joibe ai 26 di Jugn

"Côr la flumera granda" par memoreâ Renato Iacumin

Joibe ai 26 di Jugn, te suaze de seconde edizion dal festival "Incuintri di culturis: Nature cence confins", aes siet di sere a Aquilee e je in program la spassizade: "Côr la flumera granda", par memoreâ Renato Iacumin.

Si tache de place di Munistîr e si scjavace il puart fluviâl par dopo rivâ te place dal Cjapitul denant de Basiliche patriarcjâl cun leturis senichis, intervients corâi e cuntune riflession su la opare poetiche dal inteletuâl nassût tal 1941 e muart intal 2012, protagonist de vite culturâl, sociâl e politiche di Aquilee e de Basse tra i agns Sessante e il Doi mil.

Al vierzarà l'incuintri il storic Ferruccio Tassin, che al descrivarà la figure poliedriche

di Renato Iacumin, biel che l'atôr Giorgio Monte al leiarà cualchidun dai viers scrits di Iacumin.

I intervients corâi a saran par cure de corâl Natissa, fondade propit di Iacumin, direzude di Luca Bonutti.

L'incuintri, inmaneât de Societât Filologjiche Furlane cul patrocini e cu la colaborazion dal Comun di Aquilee, de "Fondazione Aquileia" e de Parochie dai Sants Ramacul e Fortunât di Aquilee, al fâs part dal proget "Cross Culture" promovût de Zveza kulturlih društev (Union dai circui culturâi) di Nova Gorica e de Associazion "Porte a Nordest" di Guriza, cu la poie dal GECT te suaze de programazion Interreg de capitâl europeane de culture 2025.

Gurize e lis Alps Juliis di Mario Micossi

Une voglade su Gurize e su lis Alps Juliis intes oparis di Mario Micossi: al è chest il teme de mostre metude sù in citât a Cjasa Ascoli, sede gurizane de Societât Filologjiche Furlane, e che e vignarà screade sabide ai 21 di Jugn, aes 4 daspò misdî, inte suaze de cunvigne che al organize ogni an Ent Friûl tal Mont.

Mario Micossi (1926-2005), che al è cognossût plui tal forest che no in Italie, al è stât pitôr e soregut incisôr e al a savût interpretâ cun mistîr il paisaç furlan.

Lis Alps Juliis a son stadis un dai grancj amôrs di Mario Micossi, mestri de tecniche de aghe tinte che e svicine la incision ae piture.

L'artist si è impegnât a visitâ a dilunc chestis Alps, maris dal Lusing, no dome pe lôr cualitât estetiche, ma ancje pe lôr posizion gjeografiche, storiche e linguistiche, stant che si cjatin inte region li che si toçjin lis trê grandis fameis

linguistichis dal continent european: chê latine, chê gjermaniche e chê slave.

Al è par chest motif che Mario Micossi, artist sensibil ai messaçs de Storie che si puedin lei intal paisaç, al à peât il profil de Basiliche di Aquilee aes Alps Juliis, intune voglade di grande sugjection che e vierç la mostre di Gurize.

La mostre, curade di Gianfranco Ellero, che al à ancje metût dongje il catalic, si pues visitâle fin ai 28 di Setembar e al vûl jessi un clâr omaç sedi ae capitâl europeane de culture 2025, sedi aes monts di li che al nas il Lusing e che in maniere ideâl a unissin, impen di dividi, il Friûl cu la Slovenie.

La mostre e sarà vierte cun chescj oraris: di lunis a joibe des 10 di buinore a misdî e mieç e des 3 e mieze aes 6 sot sere, il vinars des 10 di buinore a misdî e mieç.

A vignaran siguradis ancje viertiduris straordenariis.